

CARTA JA CUAHAN NUU NCHIVI HEBREO

Jā ní ntají Yāā Dios Sēhe yā nī nacani yā tūhun

¹ Quéhén vuelta de quéhén modo nī ncāhān Yāā Dios jíin ndá tatā ō jondē janahán, chi nī ntají yā ndá tēe nī nacani tūhun yā.

² De mitan de tiempo jā cuándihi yáhá de nī ntají yā maá Sēhe yā nī nacani yā tūhun nūū ō. De jíin Sēhe yā cúu jā ní nsáhá yā ñayīví jíin ndihi cā, de ndivií jā íyó nī nchihi yā ndahá Sēhe yā.

³ De Sēhe yā chi vii ndasí cúñáhnú yā, tá cúu nūū vii cúñáhnú maá yā. De ndihi nāsa cúu maá yā jā cúu yā Yāā Dios, suni súcuán cúu Sēhe yā. De jíin poder tūhun jā ní ncāhān Sēhe yā de íyó cutú ndihi-ni. De nī nasáhá ndoo yā yóhó ndācá cuāchi ó, de sá de nī jēcundeē yā lado cuáhá mesa maá Yāā cúñáhnú jondē andiví.

Jā cúñáhnú cā Sēhe Yāā Dios nsūú cā ndá ángel yā

⁴ De nī nduñáhnú ndasí cā Sēhe yā nsūú cā ndá ángel andiví, chi nī nīhīn yā tāhvī jā ndíso yā tiñu ñáhnú ndasí cā nsūú cā jā ndíso ndá ángel.

⁵ Chi yósō nūū tutū jā súcuán nī ncāhān Yāā Dios jíin Sēhe yā, de nsūú jíin ndá ángel yā:

Maá nú cúu Sēhe nī,
de mitan de nī nsáhá ñáhnú nī ndóhó jā cúu nī Tatá
nú.

De suni nī ncāhān yā tūhun Sēhe yā, de nsūú tūhun ndá ángel yā:

Maá nī cúu Tatá nūū Sēhe nī,

de maá ji cúu Sēhe nūū ni.

⁶ De suni tá nī ntají yā Sēhe yā jā cúñáhnú, nī nquiji inī ñayīví yáhá, de nī ncāhān yā:

Ndihi ángel ni ná chíñúhún ji Sēhe nī.

⁷ De súcuán nī ncāhān yā tūhun ndá ángel yā:

Tá cúu nūū yíhí tāchī, súcuán cúu jā jíca ndá ángel ni sáhá nī,

de ndācá ñúcuán jā sátíñú nūū ni, tá cúu yáñuhún cúu.

⁸ Sochi tūhun Sēhe yā chi sa cáhān yā:

Maá nú cúu Yāā Dios, de tatúnī nū ní cání, de jā tátúnī nū chi maá-ni tiñu ndāā cúu.

⁹ Cúsiī inī nū jín tiñu váha, de nduú jétahān cuitī inī nū tiñu néhén.

Jā ñúcuán cúu jā nduhū, Yāā Dios maá nú, nī nsāhá nī

jā cúsiī ndasí cā inī nū nsūú cā ndá cā jā íyó andiví.

¹⁰ De suni cáhān yā:

Maá nú cúu Jētohō, de jondē xihna ñúhún nī nsāhá nú jā ní jēcōo ñayīví.

De andiví chi suni jā ní nsāhá maá nú cúu.

¹¹ De ndá ñúcuán chi naā, sochi maá nú chi ní cání íyó nú.

De ndá ñúcuán chi cutúhú tá cúu nūū cutúhú iin sahma,

¹² de nacahnū nū tá cúu nūū nátahnū iin sahma, de nasāma nú ndá.

Sochi maá nú chi mā násāma cuitī nū,

de quīvī jā cutecū nū mā ndihí cuitī.

¹³ De súcuán nī ncāhān tucu yā jín Sēhe yā, de nsūú jín ndá ángel yā:

Cundee nū lado cuáhá nī nūū cuñáhnú nú,

de sáhá nī jā candeē nū poder ndācá jā jínī ūhvī ndóhó.

Ncachī yā.

¹⁴ De ndá ángel yā chi mozo-ni cúu, de tájí yā cuāhān jā chindeé ndá nchivī jā nīhīn táhvī jā scácu yā.

2

Jā má cúhuun inī ō jín tūhun jā scácu yā yóhó

¹ Túsaá de cánuú jā vāha cā chuhun inī ō ndācá tūhun yā jā ní jini ó, chi tú nduú de sanaā de scuíta ó.

² Chi jondē janahán nī jetíñú yā ndá ángel yā nī ncachī tūhun tūhun yā, de nī jinī nchivī jā íyó ndāā. De nchivī nīhin inī jín nchivī jāā nduú ní ncándíja tūhun ñúcuán, vātu-ni nī nīhīn jī castigo.

³ De tú súcuán nī ncuu, de yóhó, ¿nāsa cācu ó de tú mā chūhún inī ō tūhun cánuú cā jā scácu yā yóhó? Chi xihna cā maá Jētohō ō nī nacani yā tūhun yáhá, de sá de ndá tēe jā ní jini, nī nacani tucu ndá dē nū ō.

⁴ De Yāā Dios suni nī nchindeé yā ndá dē jā ní nacani dē tūhun yā. Chi nī nsāhá yā jín dē jā ní nsāhá dē sín sín tiñu ñáhnú jā sáhvi inī ō jā jín ō poder yā. De suni nī jēhe yā Espíritu Santo yā nū iin iin ó, nāsa nī jētahān inī maá yā jā sāhá ó.

Jā ní nduu Jesús iin táhán nchivī

⁵ De Yāā Dios nsūú nū ndá ángel yā ní jēhe yā tūhun jā cundiso tíñú sīquī ñayíví jā quiji, chi sa nū Sēhe yā Cristo nī jēhe yā. De sīquī ñayíví ñúcuán cúu jā cáhān nī yáhá.

⁶ Chi suha yósō nū tutū jā ní ncāhān David jín yā:

¿Nā cuá cúu nchivī jā ñúhún inī ní jī?

De ndíhvī inī ní sīquī jī, de nchivī-ni cúu jī.

⁷ Chi jacū-ni tiempo nī nsāhá ní jā núu jī nūū ndá ángel ní.

Ñúcuán de sāhá ñáhnú ní jī de squéndōo yíñúhún ní jī,

de canī ní jī jā ndacu jī tiñu nūū ndācá jā ní nsāhá ní.

⁸ De ndíhi jā íyó chi sāhá ní jā cuñáhnú jī nūū.

Cáchī tutū. De jā ní nsāhá Yāa Dios jā cúñáhnú jī nūū ndíhi, túsaá de mā quéndōo ni iin jā má cúñáhnú jī nūū. De vísō súcuán de mitan de ncháha ca cunī ō jā cúñáhnú jī nūū ndíhi jā íyó.

⁹ Sochi jā jínī ō mitan cúu Jesús, Yāa jā ní nduu núu jacū-ni tiempo nūū ndá ángel yā. Chi súcuán nī ncuu tácu cuū yā jēhē ndíhi nchivī, sīquī jā vāha ndasí inī Yāa Dios jín ó. De mitan de vīi ndasí nī nduñáhnú tucu yā, de ndíhi-ni íyó yíñúhún nūū yā, chi nī ndoho yā jā ní jīhī yā jēhē nchivī.

¹⁰ De ndíhi jā íyó chi cuenta Yāa Dios cúu, chi maá yā nī nsāhá. De suni ndéca yā cuāhā ndasí sēhe yā jā quíhīn jī andiví nūū vīi cuñáhnú jī jín yā. De vāha níhīn tiñú jā ní jēhe yā tūndóhó nūū Jesús, chi jā ní ndoho yā súcuán de cuu cundeca vāha yā nchivī jā ní scácu yā.

¹¹ Chi Jesús jā ní nsāhá ndoo yā jī de maá jī jā ní ndundoo jī, chi iin-ni Tatá jī jín yā. De jā ñúcuán nduú cúcanoō Jesús jā cáhān yā hermano yā jī.

¹² Chi yósō nūū tutū jā ní ncāhān yā jín Tatá yā: Cachī sá tūhun ní nūū ndá hermano sá, de māhñú nūū ndútútú jī cata sá nāsa cúñáhnú ní.

¹³ De suni cáhān yā tá cúu nūū cáhān ndá hermano yā:

Nduhū chi cándíja nī yā.

De cáhān tucu yā:

Yáhá íyó nī jín ndá sēhe Yāa Dios jā ní jēhe yā nū
ni.

Ncachi Jesús.

¹⁴ De tá cúu nū cácu nchivī jā cúu jī iin yiqui cúñu, suni súcuán nī ncacu Jesús, tácu cuu cuū yā jēhē ō. De súcuán nī snāa yā poder tächī cúñáhnú jā squívi nchivī nū cuāchi de jíhī jī.

¹⁵ De nī ncacu yā súcuán tácu cuu tavā yā ndācá nchivī chījin tūhun jā yúhú jī cuū jī. Chī nī vida jī ndóho jī sáhá ñúcuán.

¹⁶ De jāndāa chī nduú ní nguíji yā jā chindeé yā ndá ángel yā, chī sa jā chindeé yā ndá nchivī cándíja jā ní nduu tatā Abraham.

¹⁷ Jā ñúcuán nī jīni ñúhún jā nduu inuú yā jín ndācá hermano yā, tácu cuu yā sūtū cúñáhnú jā squíncuu vāha yā ndācá tiñu jēhē jī nū Yāa Dios, chī nī ncundáhvī inī yā jī. De súcuán nī nsāhá yā tácu sōcō yā maá yā jēhē jī de sndáhvā yā cuāchi jī.

¹⁸ Chī suni jondē maá yā nī ndoho yā jā ní jito túnī tūndóhó yā, de jā ñúcuán cuu chindeé yā nchivī jā jito túnī tūndóhó jī.

3

Jā cúñáhnú cā Jesús nsūú cā Moisés

¹ Hermano, nī ncana Yāa Dios ndá ndóhó, de cúu nú nchivī ndoo maá yā. Túsaá de nacani vāha inī nū sīquī Cristo Jesús, Yāa jā cúu apóstol jā ní ntetínú Yāa Dios, de suni cúu yā sūtū cúñáhnú sīquī tūhun cándíja ó.

² Chī nī squíncuu vāha yā nū Yāa Dios, Yāa jā ní ntee tiñu ñúcuán sīquī yā, tá cúu nū ní squíncuu

vāha Moisés nūū ndá nchivī jā ní ncāhān Yāā Dios jā cúu ji nchivī vehe yā.

³ De cúñáhnú ndasí cā Jesús nsūú cā Moisés, tá cúu nūū cúñáhnú ndasí cā tēe sáhá vehe nsūú cā maá vehe.

⁴ Chi ndācá vehe íyó tēe jā ní nsāhá. Sochi maá Yāā Dios cúu jā ní nsāhá ndācá jā íyó.

⁵ De Moisés nī squíncuu vāha dē jín tiñu jā ní ncuu dē mozo nī jito dē nchivī vehe Yāā Dios. De nī ncachī tūhun dē sīquī ndācá tūhun jā stéhēn yā tiempo jā quiji.

⁶ Sochi Cristo chi sa cúu yā maá Sēhe jā ndácu tiñu nūū nchivī vehe Tatá yā, de vāha squíncuu yā jēhē ji. De suni maá ó cúu nchivī vehe yā, de tú cuiñi nīhin ó jín tūhun jā cándíja ó jondē quīvī sándihí, de tú cúsiī inī ō jā ñúhún inī ō ndācá jā váha jā coo.

Tūhun jā natātú nchivī Yāā Dios

⁷ Túsaá de ná chūhun inī ō jā cáhān Espíritu Santo nūū tutū ī:

Mítan de tú cunini ndá nú jā cáhān Yāā Dios,

⁸ de mā cúnīhin inī nū tá cúu nūū ní ncunīhin inī nchivī janahán.

Chi nduú ní ncándíja ji nūū yā tá nī jica ji nūū ñuhun tíhá.

⁹ Chi ñúcuán nī nsāhá tatā ndá nú tiñu jā ní nguītī inī nī, ncachī yā,

vísō nī jinī ji tiñu ñáhnú jā ní nsāhá nī ūū xico cuīyā.

¹⁰ Jā ñúcuán nī nguītī inī nī jín nchivī tiempo ñúcuán.

De nī ncāhān nī jā maá-ni jā sndóo ji ichi ndaā, chi nduú cúnī ji cuniquīn ji tūhun nī.

¹¹ De jā ñúcuán nī nguītī inī nī, de nī ncāhān téyí nī

jā má quívi cuitī ndá ji nūū natātú ji sáhá nī.
Ncachi yā.

¹² Túsaá, hermano, coto ndá nú jā má cōó nēhén
ánō ni iin nú jā caca yátá nú jā má cándíja cā nū Yāa
Dios, Yāa técū.

¹³ Chi sa ndācá quīvī sndíhvī tāhán inī nū, juni íyó
cā tiempo, tácuā mā cúnīhin inī ni iin nú jā stáhvī
cuāchi ndóhó.

¹⁴ De tú ná cuíñi nīhin ó jondē quīvī sándíhí jín
tūhun jā ní nguijéhé ó jín, ñúcuán de coo cáhnú ó
jín Cristo.

¹⁵ Chi cáhān tutū:
Mitan de tú cunini ndá nú jā cáhān Yāa Dios,
de mā cúnīhin inī nū tá cúu nūū ní ncunīhin inī
nchivī janahán.

Cáchī.

¹⁶ ¿De ní nchivī cúu jā ní jini tūhun yā de nī
ncunīhin inī? Suu ndihi nchivī jā ní scácu Moisés
jā ní nquee Egipto.

¹⁷ ¿De ní nchivī cúu jā ní nguītī inī yā nūū ūū xico
cuīyā? Suu nchivī jā ní nsáhá cuāchi de nī jīhī ndá
ji nūū ñuhun tíhá.

¹⁸ ¿De ní nchivī cúu jā ní ncāhān téyí yā jā má
quívi cuitī ji nūū natātú ji sáhá yā? Suu ndá nchivī
jáá nduú ní ncándíja nūū yā.

¹⁹ Túsaá de jínī ō jáá nduú ní ncúu quívi ndá ji
nūū natātú ji, sīquī jáá nduú ní ncándíja ji yā.

4

¹ De juni íyó cā tūhun jā ní nquee yuhú yā jā
quívi nchivī ndahá yā jā natātú ji sáhá yā, de ná
cóo cuidado ō jā má stíví ó, tácuā mā cōó sava nú
jā má níhīn nū quívi nú.

² Chi suni maá ó nī jini ó tūhun jā scácu yā yóhó, tá cúu nūū ní jini nchivī janahán. Sochi nūū maá ji chi nduú ní jétíñú tūhun jā ní jini ji, sīquī jāá nduú ní ncándija ji.

³ De yóhó jā cándija, chi maá ó cúu jā quívi ndahá yā jā natátú ó. De sīquī nchivī jāá nduú cándija nī ncāhān yā suha:

Jā ñúcuán nī nguītī inī nī, de nī ncāhān téyí nī jā má quívi cuitī ndá ji nūū natátú ji sāhá nī. De súcuán nī ncāhān yā vísó ja íyó tūha nūū natátú ji jondē tá nī jēcōo ñayíví.

⁴ Chi súcuán yósó tūhun nūū tutū īī sīquī quívi újā: Nī nsínu Yāa Dios ndācá jā ní nsāhá yā, de nī natátú yā quívi újā.

⁵ De suni yósó tucu nūū tutū īī:

Mā quívi cuitī ndá ji nūū natátú ji sāhá nī. Ncachī yā.

⁶ Túsaá de íyó cā nchivī jā quívi ji ndahá yā jā natátú ji. Chi nchivī janahán jā ní jini tūhun jā scácu yā ji, nduú ní nguívi ji sīquī jāá nduú ní ncándija ji nūū yā.

⁷ Jā ñúcuán nī jani tucu yā incā quívi jā quívi nchivī, de quívi ñúcuán cúu mitan. Chi tá nī nchāha cuāhā tiempo jā ní ncāhān yā jíin nchivī janahán, de yósó nūū tutū jā suni nī ncāhān David suha nī nsāhá yā:

Mitan de tú cunini ndá nú jā cāhān yā, de mā cúnīhin inī nū túsaá. Cáchī tutū.

⁸ De Josué nī squívi dē nchivī Israel janahán iin lugar nūū natátú ji. De vísó súcuán de nduú ní ncúu squívi dē ji nūū yā jā natátú ánō ji. Chi tú súcuán de

mā cáhān cā Yāā Dios jín ndācá nchivī jā mitan cúu quīvī jā quīvi ndá ji nūū natātú ji.

⁹ Túsaá de íyó tūha iin nūū natātú nchivī Yāā Dios, tá cúu nūū ní natātú maá yā.

¹⁰ Chi nchivī jā quīvi nūū natātú ji jín yā, chi natātú ji jā ní nsatínú ji, tá cúu nūū ní natātú Yāā Dios nūū tiñu jā ní nsāhá maá yā.

¹¹ Túsaá de ná ndúcú ndéé ó quīvi ó ndahá yā jā natātú ó, de mā sāhá ni iin ó cuāchi jā má cándíja ó yā, tá cúu nūū ní nsāhá ndá ji jondē saá.

¹² Chi tūhun Yāā Dios chi técu de íyó poder. Chi cúu tá cúu iin espada jā xēen ndúū lado, chi nástúu cájí nāsa íyó jāá ntúnī ō jín ánō ō, tá cúu nūū sáhá espada jā jéhdē de nástúu nūū ñútáhn yiqui jín mĩnqui. De tūhun yā nástúu ndihi nāsa jáni inī ō jín nāsa cúnī ō sáhá ó.

¹³ De nduú íyó ni iin jā yíyuhū jāá nduú jínī maá Yāā jā náquehen cuenta, chi ndihi-ni jínī vāha yā, de ndihi-ni túu nijīn nūū yā.

Jesús cúu sūtū cúñáhnú cā

¹⁴ De névāha ó iin sūtū cúñáhnú cā, de ja nī ndaa yā nī ndīvi yā nūū íyó Yāā Dios. De Jesús Sēhe Yāā Dios cúu yā. Jā ñúcuán ná cuíñi nīhin ó jín tūhun jā ní ncandíja ó.

¹⁵ Chi névāha ó iin sūtū cúñáhnú jā cundáhvī inī yóhó jāá nduú nā fuerza ō jā squíncuu vāha ó. Chi tá cúu nūū ndóho ó jā jító túnī tāchī cúñáhnú yóhó, suni súcuan nī ndoho maá yā jā ní jító túnī ji yā, vísō nduú nā cuāchi cuitī yā.

¹⁶ Túsaá de mā cúyūhú ó, chi ná quīvi ó yuhú mesa yā jā cācān táhvī ō. Chi mānī yā jín ó, de

cúndáhvī inī yā yóhó, de sīquī jā váha inī yā de chíndeé yā yóhó ndācá vuelta jā jínī ñúhún ó.

5

¹ De ndācá sūtū jā ní ncuñáhnú janahán, nī nacāji Yāa Dios dē māhñú nchivī, de nī jani yā dē jā cuiñi dē nūū yā jēhē nchivī, de sōcō dē ndatíñú jín quti nūū yā jā síquī cuāchi ji.

² De cuu cāhān vitá dē jín nchivī jāá nduú jícūhun inī jín nchivī jā stívī, chí saá-ni maá dē nduú nā fuerza inī dē jā squíncuu vāha dē.

³ Jā ñúcuán cúu jā suni cánuú jā sōcō dē quti nūū yā jā síquī cuāchi maá dē, nsūū maá-ni jā síquī cuāchi nchivī.

⁴ De nī iin tēe nduú cúu sāhá ñáhnú dē maá dē jā cuu dē sūtū cúñáhnú, chí sa maá Yāa Dios cúu jā nácāji yā dē, tá cúu nūū ní nacāji yā Aarón jondē janahán.

⁵ De saá-ni Cristo, nduú ní nsáhá ñáhnú yā maá yā jā cuu yā sūtū cúñáhnú, chí sa Yāa Dios nī nsáhá, chí nī ncāhān yā tūhun yáhá:

Maá nú cúu Sēhe nī,
de mitan de nī nsáhá ñáhnú nī ndóhó jā cúu nī Tatá
nú.

⁶ De suni cāhān tucu yā nūū tutū ī:

Níí cání cúu nú sūtū,
suu maá clase sūtū jā ní ncuu Melquisedec.

⁷ De Cristo tá nī īyo yā ñayīví, de nī jicān táhvī yā, de jondē nī jacu yā de nī jacu cóhó yā. De nī ncāhān ndāhvī yā jín Yāa Dios, Yāa jā cuu scácu yā jā má cúu yā nícu. De sīquī jā yíñúhún nī nchiñúhún yā Yāa Dios, de nī nchindeé nī nchituu Yāa Dios yā jā ní jendeé inī yā jín tūndóhó.

⁸ Chi vísō Sēhe Yāā Dios cúu yā, de nī ncandíja yā nī ndoho yā inī ñayiví, de súcuán de nī jinī yā nāsa cúu tūhun cándíja.

⁹ De tá nī ncuu nī squíncuu ndihi yā jā ní ncandíja yā, de nī ncucutú tūhun jā scácu yā ndācá nchivī jā cándíja nū yā, de cutecū jī nī cání.

¹⁰ Chi nī jani Yāā Dios yā jā cúu yā sūtū cúñáhnú, suu maá clase sūtū jā ní ncuu Melquisedec.

Sīquī jā má cācá yátá jī

¹¹ De íyó cuāhā tūhun jā cachī tūhun nī sīquī ndācá yáhá. Sochi víjín cúu jā jīcūhun inī ndá nú sáhá nī, sīquī jāá nduú cúnī nū chuhun inī nū.

¹² De ja nī ncunahán cándíja ndá nú, de jīni ñúhún jā cuu nú tēe stéhēn nícu. De nduú chi sa jīni ñúhún tucu ndá máá nú tēe jā stéhēn nū nū ndācá tūhun Yāā Dios jāá nduú víjín cuitī. Chi sa nī nduu nú modo sūchí ñíquín jā jīni ñúhún caxīn, chi ncháha ca cuja jī caji jī jā cājí. Súcuán cúu ndá nú chi ncháha ca cuja nú jín tūhun víjín cā.

¹³ Chi tú cúu ndá nú cúsá maá modo sūchí ñíquín jā jáxīn, túsaá de nduú cúu jīcūhun vāha inī nū tūhun ndāā.

¹⁴ Sochi nchivī ja nī jija, chi yājī jī jā cājí, cúu jā ní ncutūha vāha jī de ja cuu nacāji jī jā vāha jín jā nēhén.

6

¹ Túsaá de ná yáha ó nū ndá tūhun Cristo jāá nduú-ni víjín, de ná cóhōn nū tūhun jā víjín cā, tácuá ná cúja vāha inī ō jín tūhun yā. De mā ndíjéhe tucu ó jín tūhun jā ní scuáha ó xihna cā, suu tūhun jā nácani inī ō jā sndóo ó ndá cuāchi jā sáhá jā naā ō, jín jā cándíja ó Yāā Dios,

² jíin sīquī jā jénduté, jíin sīquī jā téé ndahá xīnī nchivī, jíin sīquī jā natecū ndīyi, jíin sīquī jā tǎnū tǎhvī nchivī ní cǎní.

³ Túsaá de ná yáha ó nūū ndācá yáhá de quīvi ó nūū tūhun víjín cǎ, de tú cuāha Yāā Dios tūhun.

⁴ Chi íyó nchivī jā ja nī jīcūhun inī ji, de ja nī jinī ji ndācá jā jéhe Yāā Dios, de ja nī nguīvi ji nūū tūhun jā stéhēn Espíritu Santo,

⁵ de suni ja nī jinī ji tūhun vāha Yāā Dios jíin nāsa coo poder yā tiempo quiji.

⁶ De nchivī ñúcuán tú caca yátá ji, de mā cūú cǎ ndijéhé jeé ji jā nacani inī ji. Chi jā caca yátá ji cúu modo jā jáhnī tucu ji Sēhe Yāā Dios yīcǎ cruz, de jéhe ji tūhun canoō yā jínī nchivī.

⁷ De nchivī chi cúu ji tá cúu ñuhun jā cúun vāha sǎvī nūū de ndóyo vāha. De tú néne jā váha jā cajī ndá tēe sátíñú, ñúcuán de cúsi inī Yāā Dios jíin.

⁸ Sochi tú néne maá-ni iñu ñúcún jíin yūcū jā sátéñú, túsaá de nduú jétíñú cuitī, de squéne yichī yā, de iin quīvi de cǎyū. Súcuán tǎnū tǎhvī nchivī jā jíca yátá.

Jā ñúhún inī ō ndācá jā váha jā coo

⁹ De ndá máá nú hermano, vísō cǎhān ndá nī súcuán jíin nú, de jínī vāha nī jā cúu nú nchivī jā cuiñi nīhin, chi nchivī jā ní scácu yā cúu nú.

¹⁰ De Yāā ndāa cúu Yāā Dios, de nduú nāā inī yā tiñu jā sáhá ó. Chi sīquī jā íyó mǎnī nū jíin yā de nī ncundáhví inī nū ndá hermano nū jā cándíja, de nī nchindeé nú ji, de súcuán sáhá ndá nú jondē mitan.

¹¹ De cúnī ndá nī jā níní súcuán sáhá cǎ tá iin iin nú jondē quīvi sándīhí, chi jā sáhá nú súcuán de nīhīn nū ndīhi jā ñúhún inī nū.

12 De cúnī ndá nī jā má cúhuun inī ndá nú, chi sa ndacu nú nchivī cándíja jā jín paciencia ndétu ndá ji, de jā ñúcuán nīhīn táhvī ji ndacá jā ní nquee yuhú yā.

13 Chi quīvī jā ní nquee yuhú Yāā Dios nūū Abraham, de nī nacunehen yā maá yā jā ní ncāhān téyí yā, chi nduú cā nā incā cuu nacunehen yā jā cúñáhnú cā nsūú cā maá yā jā cuu testigo yā.

14 De nī ncāhān yā: Jāndāā ndija jā vāha ndasí sāhá nī ndóhó, de sāhá nī jā nducuahā ndasí tata nū, ncachī yā jín Abraham.

15 De jín paciencia nī ndetu dē, de súcuán de nī nīhīn dē jā ní nquee yuhú yā.

16 Chi tá cáhān téyí ndá nchivī, de nácunehen ji sívī iin jā cúñáhnú cā nsūú cā maá ji. De tú íyó iin tūhun jāá nduú cándíja táhán, de tú iin tēe cáhān téyí dē jín sívī Yāā Dios, ñúcuán de jéncuīñī jā tétáhán.

17 De saá-ni Yāā Dios, chi nī ncāhān téyí yā nūū nchivī jā cuāha yā táhvī ji. Chi nī ncuu inī yā jā cucáhnú vāha inī ji jā má nácani yátá inī yā sīquī jā ní nquee yuhú yā jā cuāha yā nūū ji.

18 Chi mā nácani yátá cuitī inī yā sīquī tūhun jā ní ncāhān yā ūū vuelta, iin cúu jā ní nquee yuhú yā, de incā cúu jā ní ncāhān téyí tucu yā sīquī tūhun ñúcuán. Chi nduú stáhvī cuitī yā. De jā ñúcuán ndá máá ó jā ní jīquisāhvi ó nūū yā, chi íyó ndeé ndasí inī ō, de ñúhún téyí inī ō jā squíncuu yā jā ní ncāhān yā.

19 De sīquī jā súcuán ñúhún inī ō, de suu sáhá jā quéndōo cutú ánō ō jín tūhun yā, de cucáhnú vāha inī ō, tá cúu nūū quéndōo cutú barco jā tīn gancho

yūū. De sáhá jā cuu quīvi ó andiví nūū īī cā, jā cúu modo cuarto īī cā jā ní īyo ichi chátā sahma jā ní ndita caa inī vehe īī janahán.

²⁰ De inī ñúcuán chi xihna cā Jesús nī nguīvi, tácuā nacune yā ichi jā quīvi ó. De jā ñúcuán ní cání cúu yā sūtū cúñáhnú tá cúu nūū ní ncuu sūtū Melquisedec.

7

Jā cúu Jesús sūtū tá cúu nūū ní ncuu Melquisedec

¹ De maá Melquisedec nī ncuu dē rey ñuū Salem, de nī ncuu dē sūtū nūū Yāā Dios, Yāā cúñáhnú ndasí. De nī jētahān dē Abraham tá nī nenda Abraham jā ní ncundeé dē nī ncanāá ndá dē jín ndá rey. De nī jīcān táhvī dē jēhē Abraham.

² De ndācá ūxī ndatíñú jā ní ncandēē Abraham nūū ndācá rey, nī jēhe dē iin iin nūū ñúcuán nūū Melquisedec. De síví Melquisedec cáchī: Rey jā sáhá tiñu ndāā. De suni nání dē Rey Salem, de tūhun Salem cáchī: Jā íyó ndeé íyó sīī inī. De jā ñúcuán suni nání dē: Rey jā sáhá jā íyó ndeé íyó sīī inī nchivī.

³ De nduú cáhān tutū tūhun tatā dē nī naná dē nī ndācá tatā dē. De suni nduú cáhān jā ní ncacu dē jín jā ní jīhī dē. Chi cúu dē tá cúu Jesús, Sēhe Yāā Dios, chi ní cání cúu dē sūtū.

⁴ De cūndēhé ndá nú nāsa ñáhnú nī ncuu Melquisedec, chi tatā ō Abraham jā ní ncuñáhnú, nī jēhe dē iin iin nūū ndācá jā ūxī nūū dē sīquī ndācá jā ní ncandēē dē nūū ndá rey.

⁵ De jínī ō jā ndācá ūxī ndatíñú jā ní nīhīn nchivī, nī jēhe jī iin iin nūū, nī nquehen ndá tēe cúu sūtū tatā Leví, tá cúu nūū cáhān ley Moisés. De nī

nquehen dē nūū nchivī jā cúu táhán dē, chi iin-ni tatā Abraham cúu ndá dē jíin ji.

⁶ De Melquisedec chi nsūú tatā Leví cúu dē, de vísō sūcuán de nī nquehen dē iin iin nūū ndācá jā úxī nūū Abraham. De suni nī jīcān táhvī dē jēhē Abraham, vísō cúu Abraham tēe jā ní nquee yuhú yā nūū dē jā sāhá yā jēhē dē.

⁷ De jíinī vāha ó jā tēe cúñáhnú cā cúu jā jīcān táhvī jēhē tēe núu cā.

⁸ De ñayīví yáhá chi ndācá sūtū chi quēhen dē iin iin nūū ndācá jā úxī nūū nchivī, vísō cúu ndá dē tēe jíhī. De Melquisedec suni nī nquehen dē, sochi maá dē chi cáhān tutū ī jā tēcū dē.

⁹ De suni cuu cāhān ō jā Leví, tēe jā ní nquehen iin iin nūū ndācá jā úxī nūū nchivī, suni modo jā nūū maá dē nī nquehen Melquisedec iin iin nūū ndācá jā úxī. Chi jā ní jēhe Abraham nūū Melquisedec, suu cúu modo jā suni nī jēhe dē cuenta Leví jíin ndihi cā tatā dē jā quiji.

¹⁰ Chi tatā Abraham cúu Leví, de vísō ncháha ca cacu dē quīvī jā ní jētahān Melquisedec Abraham, de modo jā ní jēhe maá Leví cúu jā ní jēhe Abraham.

¹¹ De chījin tatā Leví nī nquiji sūtū Aarón jíin ndá cā sūtū jā ní nquiji. De nī stéhēn ndá dē ley yā nūū nchivī Israel janahán. De tú ní ncúu sāhá dē jā quendōo ndāā nchivī jíin ley ñūcuán nícu, de nduú cā cánuú jā nūcuīñī incā clase sūtū lugar Aarón jíin ndá tatā dē. De incā clase sūtū cúu Cristo jā cúu yā tá cúu nūū ní ncuu Melquisedec.

¹² De tú nūcuīñī incā clase sūtū, de suni cánuú jā sāma ley sīquī ndá tatā dē.

¹³ Túsaá de nī nsāma ley ñúcuán, chí cáhān tutū ī jā Jētohō ō Jesús cúu incā clase sūtū, de nī ncacu yā chíjin incā tatā. De tatā nūū ní nquiji yā, nduú ní iin ní ncúu sūtū.

¹⁴ Chí jínī vāha ó jā chíjin tatā Judá nī ncacu Jētohō ō. De tatā ñúcuán chí nduú ní ncāhān cuitī Moisés jā cuu jī sūtū.

¹⁵ De cájī cúu jā ní nūcuñī Cristo jā cúu yā incā clase sūtū tá cúu nūū ní ncuu Melquisedec.

¹⁶ De nduú cúu yā sūtū jā ní ncacu chíjin tatā Leví tá cúu nūū cáhān ley janahán. Chí cúu yā sūtū sīquī jā ndíso yā poder jā cutecū yā níí cání de mā cúu cuitī yā.

¹⁷ Chí súcuan nī ncāhān Yāa Dios tūhun yā:

Níí cání cúu nú sūtū,
suu maá clase sūtū jā ní ncuu Melquisedec.

¹⁸ Túsaá de tiñu jā ní ndacu ley janahán sīquī sūtū, chí nī naā mitan, chí nduú ní níhīn tiñú quendōo níí cání.

¹⁹ Chí ley Moisés nduú ní nsáhá jā quendōo ndāa nchivī. De nī níhīn ō iin tūhun vāha cā jā ñúhún inī ō jā sndáhvā Cristo cuāchi ó, de súcuan nī ncuñatin ó nūū Yāa Dios.

²⁰ De jín jā ní ncāhān téyíí Yāa Dios de cúu Jesús sūtū.

²¹ Chí ndá cā tēe ñúcuán, nsūú jín tūhun jā ní ncāhān téyíí yā nī ncuu dē sūtū. Sochi Jesús chí nī ncāhān téyíí Yāa Dios jā cuu yā sūtū, chí súcuan cáhān tutū:

Nī ncāhān téyíí maá Jētohō ō Yāa Dios, de mā nácani yátá inī yā:

Níí cání cúu nú sūtū,
suu maá clase sūtū jā ní ncuu Melquisedec.

Ncachī yā.

²² Túsaá de jíín Jesús nī ncucutú iin contrato vāha cā nsūú cā ley janahán.

²³ De ndá cā sūtū ñúcuán, chi nī iyo cuāhā dē, sīquī jā jííí ndá dē de nduú ní ncúu cuiñi dē níí cání.

²⁴ Sochi Jesús chi cúu yā sūtū jā cuiñi níí cání, chi técu yā níí cání.

²⁵ Jā ñúcuán cúu jā ndíso tíñú yā jā scácu yā nchivī jā quiiji nūū Yāa Dios jā cutecū jī níí cání. Chi níí cání técu yā de cáhān yā jēhē jī jíín Yāa Dios.

²⁶ Túsaá de vāha ndasí sūtū cúñáhnú cúu Jesús, tá cúu nūū jíni ñúhún ó. Chi sūtū īi cúu yā, de nduú nā cuāchi yā, de íyó ndoo yā, de nduú cúu yā táhān nchivī jā sáhá cuāchi, de cúñáhnú ndasí yā jondē nūū sūcún cā andiví.

²⁷ De maá yā nduú jíni ñúhún jā sáhá yā tá cúu nūū ní nsáhá ndá sūtū cúñáhnú janahán, jā ndiquivī nī nsōcō dē quiti sīquī cuāchi maá dē xihna cā, de sá de sīquī cuāchi nchivī. Chi iin vuelta-ni nī nsōcō yā maá yā jēhē ō, de nī ncuu-ni.

²⁸ Chi jíín ley Moisés nī jani ndá dē ndá sūtū cúñáhnú jāá nduú nā fuerza squíncuu vāha. Ñúcuán de cuéé cā de nī ncāhān téyíí Yāa Dios. De jíín jā ní ncāhān téyíí yā, de nī jani yā Sēhe yā jā cúu yā sūtū cúñáhnú, de sūtū ndāā sūtū vāha cúu yā níí cání.

8

Jā ndíso tíñú Cristo sīquī iin contrato jeé

¹ Túsaá de tūhun cánuú cā jā ja nī ncāhān ndá nī cúu yáhá: Névāha ó iin sūtū cúñáhnú tá cúu nūū ní ncāhān ni, de ndéē yā lado cuáhá mesa nūū ndácu tíñu maá Yāa jā cúñáhnú jondē andiví.

² De mitan de cúu yā sūtū jondē andiví, jā cúu lugar ī ndija jā ní nsāhá maá Jētohō ō Yāā Dios, nsūú nchivī. Chi nduú cáá tá cáá vehe ī janahán jā ní nsāhá nchivī.

³ De ndācá sūtū cúñáhnú nī jani Yāā Dios dē jā sōcō dē ndatíñú jín quiti nū yā. Túsaá de Jesucristo suni nī jini ñúhún jā sōcō yā jā cúu yā sūtū.

⁴ De tú ní íyo cā yā inī ñayíví, de nī mā quétáhán jā cúu yā sūtū jín ndá cā sūtū, chi níní sōcō cā ndá dē quiti tá cúu nū cáhān ley Moisés.

⁵ De tiñu jā sáhá ndá dē, chi nduú quétáhán jín jā íyó andiví. Chi cúu iin muestra-nī jā stéhēn sīquī andiví. De cúu tá cúu jā ní ncāhān Yāā Dios jín Moisés quíví jā ní nquijéhé dē nī nsāhá dē vehe ī janahán: Coto vāha nú jā sáhá nú ndācá ndatíñú tá cáá ndá jā ní stéhēn nī nū nū jondē xīnī yucu, ncachī Yāā Dios jín dē.

⁶ De mitan de sáhá Cristo tiñu ñáhnú ndasí cā nsūú cā jā sáhá ndá sūtū ñúcuán, chi ndíso tíñú yā sīquī contrato jeé jā vāha ndasí cā, chi ndíso tūhun ñáhnú cā jā ní nquee yuhú Yāā Dios jā sáhá yā.

⁷ Chi contrato ley xíhna ñúhún, tú ní nsáhá jā quee vāha tiñu nícu, de nduú cā cánuú jā coo contrato ū.

⁸ Chi nchivī janahán ñúcuán nduú ní nquéndōo ndāā jī, chi nī ncāhān Yāā Dios jín jī, cáchī tutū: Quijī quíví jā nasáhá nī iin contrato jeé jín nchivī Israel jín nchivī Judá, cáchī Jētohō ō Yāā Dios.

⁹ De mā cōó tá cúu contrato jā ní nsáhá nī jín ndá tatā jī janahán, quíví jā ní ntiin nī ndahá ndá jī,

de nī ntavā ni ji inī nación Egipto.
Chi nduú ní squíncuu vāha ndá ji jín contrato ley
ni.

Jā ñúcuán nduú cā ní ntánuú nī ji, cáchī Yāā Dios.

¹⁰ Túsaá de suha coo contrato jā nasāhá nī jín
nchivī Israel,

jondē tá quiji quīvī ñúcuán, cáchī Jētohō ō Yāā Dios:
Sāhá nī jā jīcūhun ley ni nūū jāá ntúnī ji,
de saá-ni inī ánō ji tee nī tūhun ley ni.

De cuu nī Yāā Dios ndá ji,
de maá ji cuu nchivī maá nī.

¹¹ De nduú cā jínī ñúhún stéhēn ji nūū táhán ji nūū
ñanī ji,

tácua cunī ji nāsa Yāā cúu Jētohō ji.

Chi ndihi ji cunī nāsa Yāā cúu nī,

jondē nchivī núu cā jín jondē nchivī cúñáhnú cā.

¹² Chi cune cáhnú inī ní nūū ji jā ní nsāhá ji tiñu
néhén,

de ni mā núcūhun cā inī ni cuāchi jā ní nsāhá ji.

Ncachī Yāā Dios.

¹³ De jā ní ncāhān yā jā cuāha yā iin contrato jeé
cúu jā ní ncachī yā jāá nduú cā cuetíñú contrato
xíhna ñúhún. De iin jā ní ncutúhú jāá nduú cā
jétíñú, chi jínī ō jā ja ñatin naā.

9

Vehe ī ñayíví yáhá nī stéhēn nāsa cáá andiví

¹ De ndāā chi contrato xíhna ñúhún nī ndacu tiñu
nāsa chinúhún ji yā, jín nāsa coo iin vehe ī inī
ñayíví yáhá.

² De nī ncuvāha vehe ī ñúcuán, de nī īyo ūū
cuarto. De cuarto xíhna ñúhún jā nání cuarto ī, nī
īñi candelero oro jín mesa oro jín pan ī.

³ De nī īyo sahma jā ní ndita caa jā ndásī incā cuarto jā nání cuarto īī ndasí cā.

⁴ De inī ñúcuán nī īyo iin altar oro nūū cáyū sūja īī, jín jātūn jā ñúhún contrato ley, de maá-ni oro cúu ní sīquī jātūn. De inī jātūn ínī iin tījēhēn oro jā ñúhún maná jā ní ncuun jondē andiví. De suni ñúhún vara Aarón jā ní nene yūcū, jín tabla yūū jā yósō tūhun contrato ley.

⁵ De sīquī jātūn nī īñī ndúū figura ángel querubín jā stéhēn jā ndēē Yāā Dios. De nī nsāhá cōndāhvī sīquī tapa jātūn nūū ní nchosō yúyú nīñī jā sndāhvā cuāchi. De nduú núne ó jā cāhān cā ō sīquī ndá ñúcuán mitan.

⁶ De tá nī jīnu ndācá ñúcuán, de sanúú sanúú-ni quívi ndá sūtū inī cuarto xíhna ñúhún jā sáhá dē tiñū jā cúu dē sūtū.

⁷ Sochi inī cuarto ūū, chi nduú cúu quívi nā-ni sūtū jín incā nchivī, chi mátúhún-ni sūtū cúñáhnú cā cúu jā quívi, de suni iin-ni vuelta jā cuīyā. De suni mā cúu quívi dē de tú nduú nīñī quiti jā sōcō dē nūū Yāā Dios jā sīquī cuāchi maá dē jín sīquī cuāchi nchivī.

⁸ De jín ñúcuán stéhēn Espíritu Santo nūū ō jā tá nī īyo cā cuarto īī xíhna ñúhún inī ñayiví, de nduú ní núne ichi jā quívi nchivī inī lugar īī ndasí jā cúu andiví.

⁹ Chi ndācá ñúcuán cúu jā ní stéhēn nāsa cúu tiempo mitan. Chi jā ní nsōcō ndá ji ndatíñū jín quiti nūū Yāā Dios, chi nduú ní ncúu cuitī sāhá jā quendōo ndoo ánō nchivī jā ní nsōcō.

¹⁰ Chi ndá ñúcuán nī stéhēn maá-ni sīquī yiqui cúñū ó, nāsa cajī ō, nāsa coho ó, nāsa ndundoo ó. De

nī jetíñú jondē nī nquiji Cristo jín iin modo vāha cā, de sá de nduú cā.

¹¹ Chi mitan chi ja nī nquiji Cristo, de cúu yā sūtū cúñáhnú cā jā ndíso tíñú yā sīquī ndācá jā váha jā ní nquiji mitan. De cúu yā sūtū inī lugar ī jondē andiví jā cúñáhnú cā de vāha cā nsūú cā cuarto ī janahán. De nsūú jā ní nsáhá nchivī cúu, chi nsūú cuenta ñayívi yáhá cúu.

¹² De jā ní nquīvi yā inī lugar ī ndasí cā jondē andiví, de nsūú jín nīñī ndixúhú de nī nīñī becerro, chi jín nīñī maá yā nī nquīvi yā, nī nsōcō yā iin vuelta-ni jā ní cání. De súcuán nī scácu yā yóhó jā cutecū ō ní cání.

¹³ Chi jondē janahán de nīñī stīquī jín nīñī ndixúhú jín yāa becerro jā ní ncāyū nūū altar, nī jōsō ndá dē sīquī nchivī jāa nduú íyó ndoo ánō jī, de súcuán nī ndundoo jī nūū yā.

¹⁴ De tú nī nīhīn tíñú nīñī ndācá quiti ñúcuán, de nā oncā cúu nīñī maá Cristo. Chi Yāa ndoo cúu yā, de nī nsōcō yā maá yā nūū Yāa Díos, nī nsáhá Espíritu Santo jā íyó ní cání. De nīñī yā náquete ánō ō nūū tíñu néhén jā cuū ō sáhá. De súcuán de cuu satíñú ó nūū Yāa Díos, Yāa técu.

¹⁵ Jā ñúcuán cúu jā ndíso tíñú yā sīquī iin contrato jeé. Chi nī jīhī yā, de súcuán nī ncandēē yā cuāchi jā ní nsáhá ndá nchivī tá nī īyo jī chíjin contrato xíhna ñúhún. De nchivī jā cána Yāa Díos jī jā quīvi jī ndahá yā, nīhīn jī tāhvī jī jā coo ní cání, tá cúu nūū ní nquee yuhú yā.

¹⁶ Chi cúu modo jā tá sáhá iin tēe acta jā cáhān sīquī tāhvī, de jondē tá cuū dē sá de nīhīn tíñú.

¹⁷ Chi tú técu cā tēe jā ní nsáhá, de nduú nīhīn tíñú. De jondē tá nī jīhī dē, de sá de jetíñú.

18 De saá-ni contrato xíhna ñúhún, suni nī jini ñúhún cucutú jíin nīñi quiti jā ní jīhī. De contrato jeé chi cúcutú jíin nīñi Cristo jā ní jīhī yā.

19 Chi tá nī ncuu nī ncachī Moisés ndācá tiñu jā ndācu contrato ley ñúcuán nūū ndiviī nchivī, de nī nquehen dē nīñi becerro jíin nīñi ndixúhú jíin ndute, de jíin ixi cuahá jíin yūcū hisopo nī jōsō dē yúyú nīñi sīquī libro ley jíin sīquī ndiviī nchivī.

20 De nī ncāhān dē: Yáhá cúu nīñi jā cúcutú contrato ley jā ní nsāhá Yāa Dios jíin ó, ncachī dē.

21 De suni nīñi ñúcuán nī jōsō dē jondē inī maá vehe īī jíin nūū ndācá ndatíñú jā ní jetíñú ndá dē jā chíñúhún dē yā.

22 De ja ñatin ndihi ndatíñú, chi cáhān ley yā jā jini ñúhún ndundoo jíin nīñi. De tú mā cātí nīñi de mā cúne cáhnú inī yā nūū cuáchi nícu.

Jā ní nsōcō Cristo maá yā jā candeē yā cuāchi

23 Túsaá de ndācá ndatíñú ñúcuán jā cúu muestra ndá máá jā íyó andiví, nī jini ñúhún jā ndundoo jíin nīñi quiti. De ndá máá jā íyó andiví, chi nī jini ñúhún ndundoo jíin nīñi Cristo jā váha ndasí cā.

24 De Cristo chi nduú ní nguivi yā inī lugar īī jā ní nsāhá nchivī, chi iin muestra-ni nī ncuu ñúcuán jā ní stéhēn nāsa íyó lugar īī ndija jondē andiví. Chi sa maá andiví nī nguivi yā, de mitan chi íyó yā nūū Yāa Dios jā cáhān yā jēhē ō.

25 De maá sūtū cúñáhnú cā quivi dē ndācá cuīyā inī cuarto īī cā jā sócō dē nīñi quiti. Sochi Cristo chi nduú ní nsōcō yā maá yā cuāhā vuelta, chi iin vuelta-ni.

26 Chi tú súcúan de cánuú jā cuāhā vuelta ndoho yā jondē tá nī jēcōo ñayívi de jondē mitan nícu. De

nduú chi sa tiempo jā cuándihi yáhá nī nquenda nijin yā iin vuelta-ni jā ní cání, de nī nsōcō yā maá yā jā ní ncandēē yā cuāchi.

²⁷ De tá cúu nūū ní ncundaā jā cuū ndācá nchivī iin vuelta-ni, de ñúcuán de sáhá ndāā Yāā Dios tiñu ji,

²⁸ suni súcuán Cristo nī jīhī yā iin vuelta-ni jā ní nsōcō yā maá yā tácuā candēē yā cuāchi cuāhā nchivī. Ñúcuán de ndiji yā incā vuelta, de nsūú jā sōcō tucu yā maá yā jā candēē yā cuāchi, chi sa jā scācu yā nchivī jā ndétu ji jā ndiji yā.

10

¹ Chi ley Moisés nī ncuu iin muestra-ni ndācá jā váha jā ní nquiji jín Cristo, iin jā stéhēn-ni nāsa coo maá jā váha. Jā ñúcuán nduú cúu cuitī sáhá ley jā quendōo ndāā nchivī jā quíji ji nūū Yāā Dios de sōcō ji quiti nūū cuíyā nūū cuíyā.

² Chi tú ní ncúu sáhá ley jā quendōo ndāā ji, de jencuñi jā sōcō ji quiti nícu. Chi tú ní ncúu, de iin vuelta-ni de ja nī nquendōo ndoo ánō nchivī jā sōcō ñúcuán, de mā cúyūhú cā ánō ji jā ní nsáhá ji cuāchi nícu.

³ De nduú chi jā sōcō ndá ji quiti ndācá cuíyā, sa sáhá jā núcūhun inī ji cuāchi ji.

⁴ Chi nīñi stīquī jín nīñi ndixúhú, mā cūú cuitī candēē cuāchi.

⁵ Jā ñúcuán tá nī nquiji Cristo inī ñayiví, de nī ncāhān yā jín Yāā Dios:

Jā jáhnī ji quiti jín jā jéhe ji ofrenda nūū ní, chi nduú ní jétahān inī ní.

Sochi nī nsáhá tūha ní yiqui cúñu maá sá jā sōcō sá.

⁶ De nduú ní ncúsī inī ní jā téñuhūn ji quiti de sócō ji tī jā ndundoo cuāchi ji nícu.

⁷ Ñúcuán de nī ncāhān sá: Yáhá vāji sá jā squíncuu sá tiñu jā jétahān inī ní, Tātā Yāā Dios.

Chi súcuán ja yósō tūhun sá nūū tutū.

Ncachī Jesús.

⁸ Xihna cā nī ncāhān yā jāā nduú ní jétahān inī Yāā Dios de nduú ní ncúsī inī yā jā jáhnī ji quiti de jéhe ji ofrenda, jín jā téñuhūn ji tī de sócō ji tī jā ndundoo cuāchi ji nícu, vísō súcuán ndácu ley tiñu.

⁹ De nī ncāhān cā yā: Yáhá vāji sá jā squíncuu sá tiñu jā jétahān inī ní, Tātā Yāā Dios. De jā ní ncāhān yā súcuán, de nī nsāhá yā jā jencuiñī jā sócō ndá ji quiti, chi nī nsōcō yā maá yā.

¹⁰ De nī nsāhá Yāā Dios jā íyó ndoo íyó ī ō nūū yā sīquī jā ní nsāhá Jesucristo jā jétahān inī Yāā Dios, suu jā ní nsōcō yā yiqui cúñu yā iin vuelta-ni jā níí cání.

¹¹ De ndācá sūtū ñúcuán chi ndiquivī nī īñi dē nī nsatíñú dē nūū yā, de cuāhā vuelta jáhnī ndá dē quiti jā sócō sócō dē. De ndācá ñúcuán chi mā cūú cuitī candeē cuāchi.

¹² Sochi Cristo chi iin vuelta-ni jā níí cání nī nsōcō yā maá yā jā sīquī cuāchi ó. De sá de nī jécundeē yā lado cuáhá Yāā Dios nūū cúñáhnú yā.

¹³ De ñúcuán ndétu yā mitan jondē quiji quivī jā candeē yā poder ndācá jā jínī ūhvī nūū yā.

¹⁴ Chi jā ní nsōcō yā maá yā iin vuelta-ni, de nī nsāhá yā jā níí cání quendōo ndāā nchivī jā ní nsāhá ndoo yā.

¹⁵ De maá Espíritu Santo suni cájí cáhān yā sīquī tūhun yáhá, chi xihna cā cáhān yā:

¹⁶ Suha coo contrato jā nasāhá nī jín ji,

jondē tá quiji quīvī ñúcuán, cáchī Jētohō ō Yāa Dios:
Sāhá nī jā jīcūhun ley nī inī ánō jī,
de saá-ni nūū jāá ntúnī jī tee nī tūhun ley nī.

¹⁷ Ñúcuán de cáhān cā yā:

Mā núcūhun cā inī nī ndācá cuāchi jín tiñu néhén
jā ní nsāhá jī.

Ncachī yā.

¹⁸ Túsaá de tú ja nī nee cáhnú inī yā nūū cuáchi ó,
de nduú cā cánúú jā sōcō cā ō jā síquī cuāchi ó.

Jā ní nune ichi jā quīvi ó nūū Yāa Dios

¹⁹ Jā ñúcuán hermano, mā cānī inī ō nī iin, chi
cuu quīvi ó lugar ī ndasí jondē nūū íyó Yāa Dios,
síquī jā ní jati niñi Jesucristo.

²⁰ Chi nī nacune yā iin ichi jée jā cutecū ō ní cání
sāhá yā. Chi tá nī jīhī yā de nī ntēhndē sahma jā
ndíta caa jā ndasí lugar ī ndasí cā inī vehe ī. De
súcuán nī stéhēn Yāa Dios jā núne jā quīvi ó lugar ī
ndasí cā nūū íyó yā.

²¹ De Jesús cúu sūtū cúñáhnú ndasí jā jító yóhó
nchivī jā cúu sēhe Yāa Dios.

²² Túsaá de ná quīvi ó nūū Yāa Dios, de ná cóo
ndāā ndija ánō ō, de ná cándíja nīhin ó jā íyó ndāā
ndihi tūhun yā. Chi jín niñi Cristo nī ndundoo ánō
ō nūū ndācá cuāchi jā ní nsāhá ó, de nī ndundoo ó
nūū yā jā ní jenduté ó jín ndute.

²³ De ná cuíñi nīhin ó jín tūhun jā cáhān ō, suu
jā ñúhún inī ō jā sāhá yā jā váha yóhó. De mā cācá
yátá ó, chi vāha squíncuu maá Yāa Dios jā ní nquee
yuhú yā nūū ō.

²⁴ De ná nácani inī ō nāsa sndíhvī tāhán inī ō jā
cundáhvī cā inī ō táhán ó, jín jā sāhá ó tiñu váha.

25 De níní ná ndútútú ó já chiñúhún ó yā, de mā cúhuun inī ō tá cúu nūū sáhá sava jì, chí sa víhí cā ná sndíhvī tāhán inī ō, chí ja jínī ō já cuácuñatin quívi jā nenda yā.

26 De tú ja nī jīcūhun inī ō de nī jetáhvī ó tūhun ndāā, de tú maá-ni cuāchi sáhá ó sáhá ó, túsaá de nduú cā nā incā íyó já cuū sīquī cuāchi ó.

27 Chí sa quéndōo maá-ni cā tūhun xēēn sīquī ō já quiji quívi juicio de quiji ñuhūn xēēn jā cāyū nchivī jā jínī ūhvī jì yā.

28 Nchivī jā squéne yichī ley Moisés, de tú ūū á ūnī nchivī cáhān cuāchi sīquī jì, de jíhī nahñí jì, de nduú cā nā tūhun cúndáhvī inī íyó.

29 De nā oncā cúu já má ndōhó xēēn cā nchivī jā squéne yichī jì maá Sēhe Yāā Dios, chí modo já jáñū nihnu jì sīquī yā. De sáhá jì jáá nduú jétíñú cuitī nīñí yā já ní jati sīquī contrato já ndundoo jì nūū yā nīcu. De súcuán sáhá nāvāha jì nūū maá Espíritu Yāā Dios já sáhá já váha yóhó.

30 Chí ja jínī ō já ní ncāhān maá yā: Maá nī sáhá já ndutahvī jì sīquī cuāchi jì, maá nī cuāha castigo jì, ncachī Jētohō ō. De suni cáhān: Maá Jētohō ō sáhá ndāā yā sīquī cuāchi nchivī yā.

31 Túsaá de xēēn ndasí coo sīquī nchivī jáá nduú ní ncándíja já quívi jì inī ndahá Yāā Dios, Yāā técu, já ndutahvī jì sīquī cuāchi jì.

32 De nūcūhun inī ndá nú nāsa nī ncuu ichi chátā, jondē tá cáta nī nquijéhé nú caca nú jíín luz yā, de nī jendeé inī ndá nú já ní ndoho nú quéhén tūndóhó xēēn.

33 Chí sava ndá nú nī ncāhān nēhén jì nūū nū de nī sndóho jì ndóhó nī jinī nchivī. De sava cā nū

nī jēhe nú tūhun jā cuiñi nú jín nchivī jā ní ndoho súcuán.

³⁴ Chi nī ncundáhvī inī nū nchivī jā ní nchīhi vecāa jā síquī yā, de nī ncusiī inī nū vísō nī ncandēē nchivī ndatíñú nú. Chi nī nsāhá ndá nú cuenta jā jondē andiví névāha nú iin tāhvī jā váha ndasí cā jā coo ní cání.

³⁵ Túsaá de mā siáā nū tūhun jā ní ncandíja ndija nú jā váha inī yā, chi cuāhā ndasí tāhvī nīhīn nū sīquī ñúcuán.

³⁶ Chi cánuú jā cuandēē inī nū tácuā sāhá nú jā jétahān inī Yāa Dios, de nīhīn nū jā ní nquee yuhú yā.

³⁷ Chi cáhān tutū īi:
Iin núnúú-ni cā de nenda maá Yāa jā ndiji, de mā cúcuéé yā.

³⁸ De nchivī jā ní sndáhvā ni cuāchi ji, técu ji jā cándíja ji jā sáhá nī jēhē ji.

Sochi tú caca yátá ji, de mā cúsiī inī ni jín ji.
Ncachī Yāa Dios.

³⁹ Sochi yóhó chi nduú cúu ó táhān nchivī jā jíca yátá jā tánū tāhvī ji. Chi sa cándíja ó jā nīhīn táhvī ō cutecū ánō ō.

11

Sīquī tūhun cándíja

¹ De jā cándíja ó, suu cúu jā ní ncundaā ndija inī ō jā nīhīn ō ndācá jā ñúhún inī ō, jín jā jínī vāha ó jā íyó ndija ndācá jāá nduú jínī ō nūū mītan.

² De nchivī janahān chi nī jetúhún yā ji sīquī jā súcuán nī ncandíja nīhin ji.

³ Sīquī jā cándíja ó cúu jā jícūhun inī ō jā ní nsāhá Yāa Dios ñayíví jín tūhun jā ní ncāhān yā-ni. De jín

poder Yāā Dios jāá nduú jínī ō nūū, nī jēcōo ndācá jā jínī ō nūū.

⁴ Nī ncandíja Abel jā sāhá yā jēhē dē, de jā ñúcuán nī nsōcō dē jā váha cā nūū Yāā Dios nsūú cā Caín. De jā ñúcuán nī jetáhún yā jā íyó ndāā dē, chi nī jetáhvī yā jā ní nsōcō dē quiti nūū yā. De vísō nī jīhī dē, de cáhān cā historia dē jínī ó jondē mitan, chi tēe nī ncandíja ndāā cúu dē.

⁵ Nī ncandíja Enoc jā sāhá yā jēhē dē, de jā ñúcuán nī naquehen yā dē cuāhān dē andivī, de nduú ní jīhī dē. De nduú ní nánihīn nchivī dē, chi nī ndoñúhún dē-ni nī nsāhá yā. De cáchī tutū jā jondē ncháha ca naquehen yā dē de nī ncusiī inī yā jínī ndācá jā ní nsāhá dē.

⁶ Sochi tú nduú cándíja ó jā sāhá yā jēhē ō, de nduú nā modo jā cusī inī Yāā Dios jínī ó. Chi nchivī jā cúnī quīvi ndahá yā, cánuú jā candíja jī jā íyó yā jínī jā cuāha yā tāhvī nūū nchivī jā ndúcú jī candíja jī yā.

⁷ De Noé nī ncandíja dē jā sāhá Yāā Dios jēhē dē, tá nī ncachī tūhun yā nūū dē jā coo tūndóhó jāá ncháha ca cunī dē jā coo. De jā ñúcuán nī jetáhvī dē nī nsāhá dē barco cāhnú jā nání arca, tácuā cācu dē jínī ní vehe dē. De jā súcuán nī ncandíja dē, de nī nenda cuāchi siquī nchivī jāá nduú ní ncándíja jī yā. De nī sndáhvā yā cuāchi dē siquī jā ní ncandíja dē jā sāhá yā jēhē dē.

⁸ De Abraham nī ncandíja dē jā sāhá yā jēhē dē, de jā ñúcuán nī jetáhvī dē tá nī ncāhān yā jínī dē jā quíhīn dē iin lugar nūū cuāha yā jā cuu tāhvī dē. De nī nquee dē cuāhān dē, vísō nduú jínī dē ní cúu nūū quíhīn dē.

⁹ Nī ncandíja dē jā sāhá yā jēhē dē, de jā ñúcuán nī ndeē tátū dē nūū ñuhun jā ní nquee yuhú yā jā cuāha yā nūū dē. De nī ndeē dē vehe ñii, de saá-ni sēhe dē Isaac jíin Jacob, chi suni inuú nīhīn táhvī jī jíin dē jā ní nquee yuhú yā.

¹⁰ Chi nī ñūhun inī dē jā cundeē dē maá ñuū andiví jā íyó cutú cimientó, de maá Yāā Dios nī jaquīn yā de nī nsāhá yā ñuū ñúcuán.

¹¹ De saá-ni Sara nī ncandíja ña jā sāhá yā jēhē ña, de jā ñúcuán nī nīhīn ña fuerza jā ní jīcūhun sēhe ña. Chi jondē tá nī nchāha ndasí cuiyā ña, de nī ncacu iin sēhe yíi ña, chi nī ncandíja ña jā squíncuu Yāā Dios jā ní nquee yuhú yā.

¹² De súcuán nī ncuu jā ní ntāhvī cuāhā nchivī nī nsāhá iin-ni Abraham, vísō ja ñáhnú ndasí dē. De tatā dē nī nducuahā ndasí, tá cúu tiūūn andiví, jíin ñūtín yuhú mar, jā má cūū cuitī cahvi ó.

¹³ De ndācā nchivī jā ní ncandíja ñúcuán, nī jīhī jī. De vísō nduú ní nīhīn ndá jī jā ní nquee yuhú yā, sochi nī jinī vāha jī jā súcuán coo, de nī ncusiī inī ndá jī jā nīhīn jī incā vida. De súcuán nī ncāhān ndá jī jā nchivī ñuū jīcā nchivī tátū cúu jī inī ñayīví yáhā.

¹⁴ De ndá nchivī jā cáhān súcuán, chi stéhēn cājí jī jā ndúcú jī iin ñuū jā cúu andiví nūū cúu ñuū maá jī.

¹⁵ Chi tú ní nácani inī ndá jī sīquī ñuū nūū ní nquee jī, de íyó modo jā ndicó cóo jī de tú cūnī jī nícu.

¹⁶ De nduú chi nī ncuu ndasí inī ndá jī jā cundeē jī incā ñuū vāha cā jā cúu ñuū andiví. Jā ñúcuán nduú cúcanoō Yāā Dios jā nání yā Yāā Dios ndá jī, chi ja nī nsāhá tūha yā iin ñuū nūū cundeē jī.

17 Nī ncandíja Abraham jā sāhá yā jēhē dē, de jā ñúcuán nī jēhēn dē jín Isaac jā sōcō dē ji, tá nī jito túnī yā dē. De nī iyo tūha dē jā sōcō dē sēhe dē jā mátúhún ji-ni nūū dē, vísō nī nīhīn dē tūhun jā ní nquee yuhú yā suha sīquī dē:

18 Isaac cúu tēe jā squíjéhé nī tatā nū quīhīn, cáchī tūhun jā ní nquee yuhú yā.

19 De nī nsāhá dē cuenta jā cuu nastécū Yāā Dios ji. De modo jā súcuán nī ncuu, chí cuu cāhān ō jā modo jā ní jīhī ji de nī natecū ji nūū dē, chí nī jasī yā-ni jā má cáhnī dē ji.

20 Nī ncandíja Isaac jā sāhá yā jēhē dē, de jā ñúcuán nī ncāhān dē jā tāhvī váha nīhīn sēhe dē Jacob jín Esaú tiempo quiji.

21 De suni súcuán nī ncandíja Jacob, de jā ñúcuán tá ja ñatin cuū dē de nī ncāhān dē jā nīhīn ndúū sēhe yí José tāhvī váha. De yítuu dē garrote dē, de nī nchiñúhún dē Yāā Dios.

22 De suni súcuán nī ncandíja José, de jā ñúcuán tá cuācuñatin cuū dē, de nī ncāhān dē jā ndācá tatā Israel, iin quīvī de quee ji inī nación Egipto. De nī ndacu dē jā chiyuhū ji yiqui dē ñuū nūū quīvi ndá ji.

23 De tá nī ncacu Moisés, de tatá ji naná ji nī ncandíja dē jā sāhá yā jēhē dē, de jā ñúcuán nī jito yuhū dē ji ūnī yōō. Chí nī jinī ndúū dē jā vīi cáá ji, de nduú ní nchúhú dē sīquī acta jā ní nsāhá rey jā cuū ndācá sūchí yíi.

24 De suni súcuán nī ncandíja Moisés, de jā ñúcuán tá nī jahnu dē de nduú cā ní jéhe dē tūhun jā cuu dē sēhe ñahan cúu sēhe síhí rey Egipto.

25 Chi sa nī ncuu inī dē jā ndoho dē jíín ndá táhán dē nchivī Yāā Dios, nsūú jā cusī inī dē jacū-ni tiempo jíín cuāchi.

26 Chi nī nsāhá dē cuenta jā tú cāhān nēhén nchivī sīquī dē jā sīquī Cristo, de ñúcuán sāhá jā cucuícá ndasí cā dē ndihi jā ndíso tūhun Yāā Dios nsūú cā jā cucuícá dē ndihi jā íyó nación Egipto. Chi nī ñūhun inī dē jā cuāha yā tāhvī dē.

27 De jā súcuán nī ncandíja dē, de jā ñúcuán nī nquee dē nación Egipto cuāhān dē. De nduú ní nchúhú dē jā quītī inī rey nūū dē. Chi nī ñīn nīhin dē sīquī tiñu sáhá dē, chí nī nsāhá dē cuenta jā ja jíín dē nūū Yāā jāā nduú cúu cunī ō nūū mitan.

28 De jā súcuán nī ncandíja dē, de jā ñúcuán nī ncāhān dē jā ná cáhnī nchivī tīcāchí pascua. De nī ndacu dē jā ná cóso jíi yúyú ñīñī tī viéhé jíi, tácuá tá quiji ángel jā cahñī yā ndācá sēhe nuú nchivī Egipto, de mā cáhnī yā sēhe nuú nchivī Israel.

29 De sīquī jā ní ncandíja nchivī Israel jā sāhá yā jēhē jíi, de nī nchāha jíi-nī mǎhñú Mar Rojo, chí nī nacune yā ndute de nī natūu-ni ñūhun yíchí. De suni súcuán nī ncuu inī ndá tēe Egipto jā yāha dē nícu, de nī ndasī-ni ndute sīquī dē, de nī jíhī ndá dē.

30 Nī ncandíja ndá soldado jā sāhá yā jēhē dē, de jā ñúcuán nī jícó cáva namā jā ní jícó ndúū jā ndásī ñūū Jericó, tá nī jícó ndúū ndá dē ūjā quivī.

31 De Rahab, vísō ñāhan ndiī nī ncuu ñā, sochi nī ncandíja ñā jā sāhá yā jēhē ñā. De nī nchindeé ñā ndá tēe Israel jā ní nquindēhé ndēé dē nāsa íyó ñūū ñā. De jā ñúcuán nduú ní jíhī ñā jíín nchivī ñūū ñā jā nīhin inī.

³² ¿De nāsa cāhān cā ni túsaá? Chi nduú cā nā tiempo jā nacani cā ni tūhun Gedeón jín Barac jín Sansón jín Jefté jín David jín Samuel jín ndācá tēe jā ní nacani tūhun yā jondē janahán.

³³ Nī ncandíja ndá dē jā sāhá yā jēhē dē, de jā ñúcuán nī ncundeé dē nī natiin dē ndācá ñuū nāhnú, de vāha nī ndacu dē tiñu nū, de nī nchin-deé yā ndá dē tá cúu nū ní nquee yuhú yā. De nū sava dē nī jasī Yāa Dios yuhú ndicaha jāa nduú ní nchájī tī dē.

³⁴ De sava dē nduú ní ncáyū dē sāhá ñuhūn jā cáyū xēen. De sava dē nī ncācu jāa nduú ní jīhī dē jín espada. De sava dē nī nanihīn inī dē tá nduú cā nā fuerza dē nícu, de ndacuī téyíí nī īyo dē nū guerra, de nī ncundeé dē sīquī soldado ndācá ñuū jīcá jā jínī ūhvī jī dē.

³⁵ De sava ñahan nī natecū sēhe ña jā ní jīhī jī. De sava cā nchivī cándíja chi sa nī ndoho xēen jī jondē nī jīhī jī. Chi nduú ní jēhe ndá jī tūhun jā siáa jī tūhun yā de cācu jī, chi nī nchuhun inī jī jā natecū jī de cundeē vāha cā jī jondē andiví.

³⁶ De sava cā jī nī nsāhá catá nchivī nū jī, de nī ncani nchivī jī, de jondē nī nuhnī jī cadena nī nchīhi jī vecāa.

³⁷ De nī ncuun nchivī yūū xīnī jī, de nī jehndē jī jín sierra, de nī jito túnī jī jín tūndóhó, de nī jahní jī jín espada. Nī jica nuu jī cháhá chúcuán, de maá-ni ñii tīcāchí ñii ndixúhú nī ñuhun jī. Nī ndoho ndáhví jī, nī jinī jī tūndóhó, nī sndóho nchivī jī.

³⁸ Vāha ndasí cā nchivī nī ncuu jī nsūú cā ndá nchivī ñayíví, de vísō súcuán de nī nsāhá nchivī jā ní jica nuu jī nū ñuhun tíhá jín chījin yucu, de nī īyo jī yavī cava jín yavī ñuhun.

³⁹ De ndācá nchivī yáhá, vísō nī jetúhún Yāā Dios jī jā ní ncandíja nīhin jī jā sáhá yā jēhē jī, de nduú ní nīhīn jī jā ní nquee yuhú yā nūū jī.

⁴⁰ Chi nī nsáhá tūha yā iin tiñu váha cā, de suu cúu jā sáhá Cristo jíin ó, tácuā iin cáhnú-ni nīhīn jī iin tāhvī váha cā jíin ó.

12

Jā ná cúnuū ō nūū mátúhún-ni Jesús

¹ Túsaá de íyó cuāhā ndasí nchivī ñúcuán jā ní ncandíja nīhin jī jā sáhá yā jēhē jī, de modo jā ní jicó ndúū jī yóhó, de stéhēn cā jī nūū ō jondē mitan jā suni súcuán ná cándíja ó. Túsaá de saá-ni maá ó, ná sáhá jíyo ó ndācá jā sátéñú jíin cuāchi jā ní ncāan ó jíin. De ná cuándēē inī ō cunu ó jíin carrera jā ní jēhe yā jā cunu ó.

² De ná cúnuū vāha ó nūū Jesús, Yāā jā ní scándíja yóhó de sáhá yā jā cuja vāha ó jíin tūhun cándíja ó. Chi maá yā nī jendeē inī yā jā ní ndoho yā yīcā cruz. De vísō tūhun canoō cúu jā súcuán cuū yā, de nduú ní nsáhá yā cuenta. Chi nī ñūhun inī yā jā cusiī ndasí inī yā tá jīnu jā ndoho yā. Sá de nī jēcundeē yā lado cuáhá mesa nūū tátúnī Yāā Dios.

³ De nacani inī ndá nú nāsa nī jendeē inī yā nī ndoho yā jā ní nsáhá nāvāha nchivī íyó cuāchi jíin yā. De súcuán de mā cuítá nú de ni mā nūū inī nū jíin tūndóhó.

⁴ Chi juni ncháha ca ndoho nú jā jondē cuū nū jā ndúcú ndēē nú snāā nū cuāchi.

⁵ De sanaā de ja nī naā inī ndá nú jā cáhān tutū īī, jā sndíhvī inī Yāā Dios ndá nú jā cúu nú sēhe yā: Séhē, mā quítī inī nū jā jēhe Jētohō ō castigo ndóhó,

de ni mā cúcuécá inī nū tú cāhān yā nūū nū.

⁶ Chi Jētohō ō jáhnū yā nchivī jā mānī yā jín, de jēhe yā castigo ndācá jā náquehen yā cuu sēhe yā. Cáchī tutū.

⁷ Túsaá de cuandee inī ndá nú jā jēhe Yāā Dios castigo ndóhó, chí sáhá yā jín nú tá cúu nūū sáhá tatá jín sēhe dē. Chi nduú nā sēhe íyó jáá nduú jēhe tatá jī castigo.

⁸ De tú mā cuáha yā castigo ndóhó, tá cúu nūū ndóho ndācá sēhe, túsaá de tá cúu sēhe ndáhví cúu nú, de nsúú sēhe ndija yā cúu nú.

⁹ De tatá ó ñayíví yáhá, suni nī jēhe dē castigo yóhó, de nī íyo yíñúhún ó nūū dē. De nā oncā cúu jā má cuétáhví ó nūū maá Tatá ó andivī jā jēhe yā castigo yóhó, de cutecū ō níí cání.

¹⁰ De ndāā chí maá dē nī jēhe dē castigo yóhó jacū-ni quīvī, nāsa nī ncuu inī maá dē. Sochi Yāā Dios chí jēhe yā castigo yóhó iin modo vāha cā jā quéndōo vāha cā ō, chí jín ñúcuán de sáhá ndoo yā yóhó tá cúu nūū íyó ndoo maá yā.

¹¹ De ndāā chí nduú cúsi inī ō maá hora jā ndóho ó castigo, chí sa cúcuécá inī ō. Sochi cúcuée cā de cunī ō jā jín castigo jā ní ndoho ó de nī ncutūha ó jā caca ndāā ō de coo ndeé coo si inī ō.

Sīquī nchivī jā squéne yichī jī tūhun jā cāhān Yāā Dios

¹² Túsaá de mā cōó ndá nú tá cúu tēe jā ní ncuitá ī ndahá, de quísi xīnī jítī, chí sa ndacuī sáhá nú maá nú nūū tūndóhó.

¹³ De caca ndāā nū ichi ndoó, tácuā nduvāha ndá ndóhó jáá nduú nā fuerza inī, jā cúu nú tá cúu tēe tiácuá jáá nduú cúu caca vāha.

14 De cundihvī inī nū jā cundeē mānī nū jín ndācá nchivī, jín jā coo ndoo coo iī nū nū yā. Chi mā cūú cunī nī iin nchivī nū māá Jētohō ō de tú nduú íyó ndoo jī.

15 De coto má caca yátá nī iin nú de siāā nū tūhun jā sáhá Yāā Dios jā váha ndóhó, tácuā mā cūú nú tá cúu iin yūcū úguā jā stívī de sáhá daño jín ndá nchivī.

16 De nī iin nú mā cācá ndī. De nī mā cúyichī inī nū nū ndá jā jēhe Yāā Dios, tá cúu nū ní ncuu Esaú. Chi sīquī iin-nī cōhō ndeyu jā ní jīcān dē nū ñanī dē, de nī nsama dē jín derecho jā nīhīn dē jā cúu dē sūchí núú, de sūcuán nī yīcō dē derecho dē.

17 De jínī ndá nú jā cúcuéé cā de nī ncuu inī dē jā cāhān tatá dē jā nīhīn dē tāhvī dē jā cúu dē sūchí núú. De nduú ní ncúu, chi nduú cā ní ntánuú Yāā Dios dē. Chi nduú ní nīhīn tiñú cā jā ní nacani inī dē, vísō nī nducú ndéé dē jondē nī jacu dē.

18 De ndá ndóhó chi nduú ní nguenda nú nū iyo cúu, tá cúu nū iyo nī ncuu māá yucu nū ní jēhe yā ley yā nū nchivī Israel. Chi nī ncāyū ñuhūn yucu Sinaí, de neē de tuún ndasí, de yíhī tāchī nīhin.

19 De nī ntivī nīhin trompeta, de nī ncāhān Yāā Dios. De nchivī jā ní jini jā cāhān yā, nī ncāhān ndāhvī jī jā má cāhān cā yā jín jī.

20 Chi nduú ní ncúndéé jī jín tūhun jā ní ndacu yā tiñu nū jī, chi nī ncāhān yā: Vísō iin quiti-nī tú quīvi tī yucu yáhá, de jini ñuhūn jā cuū tī jín yūū á jín lanza, ncachī yā.

21 De sīquī jā iyo ndasí cúu ndá jā ní jinī jī, de jondē Moisés suni nī ncāhān dē: Quísi nduhū jā yúhú nī, ncachī dē.

²² De mitan de ndá máá nú jā cándíja, chi nduú ní nguenda nú nūū yucu ñúcuán. Chi sa nūū maá yucu Sión, jín nūū maá ñuū Yāā Dios, Yāā técu, nī nguenda nú. De ñuū ñúcuán cúu Jerusalén jā íyó andiví, nūū íyó tūtú cuāhā ndasí mil ángel jā chíñúhún Yāā Dios.

²³ De nī nguīvi ndá nú nūū ndéē tūtú nchiví cándíja jā cúu sēhe Yāā Dios, jā íyó lista ji andiví. De nī nguīvi nú nūū Yāā Dios, Yāā jā sáhá ndāā tiñu ndihí nchiví, jín nūū íyó ánō nchiví vāha jā ja nī squéndōo ndāā yā ji.

²⁴ De suni nūū maá Jesús, Yāā jā ndíso tínú sīquī contrato jeé, nī nguīvi ndá nú. De yāhvi ndasí cā tiñu sáhá nīñi yā jā ní jati jā sndáhvā cuāchi ó, nsūú cā nīñi Abel jā ní ncāhān cuāchi.

²⁵ Túsaá de coto má squéne yichí nū tūhun jā cáhān yā jín ndá nú. Chi nchiví jāā nduú ní jétáhví tá nī ncāhān yā jín ji ñayíví yáhá, nduú ní ncácu ji. De xēēn cā ndoho yóhó de tú mā cuétáhví ó nūū yā jā cáhān yā jondē andiví túsaá.

²⁶ De tá nī ncāhān yā jondē saá, de nī nquisi ñayíví. De mitan chi cáhān yā: iin-ni cā vuelta quisi nī ñayíví, de nsūú maá-ni ñayíví, chi saá-ni ndācá jā íyó andiví, ncachí yā.

²⁷ De tūhun yáhá jā cáhān, iin-ni cā vuelta, chi cáchí jā sáhá jíyo yā ndācá jāā nduú íyó cutú, suu jā ní ncuvāha, tácu ná quéndōo jā coo cutú níí cání.

²⁸ Túsaá de cuāha Yāā Dios iin ñuū nūū ō jā coo cutú níí cání. De jā ñúcuán ná nácuétáhví ó nūū yā, de ná chíñúhún ó yā, de ná cóo yíñúhún ó, tácu cusí iní yā jín ó.

²⁹ Chi Yāā Dios maá ó cúu modo iin ñuhūn jā snāā ndihí jā nēhén.

13

Nāsa sāhá ó de cusī inī Yāā Dios

¹ Mā jécuiñī ndá nú jā cundáhvi inī nū ndá hermano nū jā cándíja.

² Cunahán nú jā cánuú jā cuāha núú nú vehe nū nchivī jīcá. Chi íyó vuelta jā súcuán nī jēhe núú nchivī vehe, de nduú ní jínī jī jā nū maá ángel andivī nī jēhe núú jī vehe.

³ De cunahán ndá nú jā chindeé nú nchivī jā yíhí vecāa, chi sāhá nú cuenta jā modo jā yíhí cáhnú nú jín jī vecāa. De suni nacani inī nū jēhē táhán nú jā ndóho jī sáhá nchivī, chi tú súcuán coo jín maá nú de suni ndoho nú.

⁴ Coó yíñuhún ndá nú sīquī tūhun jā jécundeē tēe jín ñahan, de mā cásíquí ndēē táhán nú. Chi maá Yāā Dios sāhá ndāā yā cuāchi nchivī ndī jín nchivī jā cásíquí ndēē táhán.

⁵ De mā ndíyo inī nū xūhún, chi cusī inī nū jín jā névāha nú-ni. Chi maá yā nī ncāhān: Mā siāā cuitī nī ndóhó, nī mā sndóo cuitī nī ndóhó, ncachī yā.

⁶ Túsaá de mā cānī inī ō nī iin, chi cuu cāhān ō: Maá Jētohō nī chindeé chítuu yā nduhū, de mā cúyūhú nī de tú nā cuá cúnī nchivī sāhá jī jín nī.

Cachī ō.

⁷ De nūcūhun inī ndá nú ndācá pastor nū, jā ní stēhēn ndá dē tūhun Yāā Dios nū nū. De sāhá vāha nú cuenta nāsa nī nīhīn tīñú jā ní nsāhá ndá dē, de ndacu nú dē jā ní ncandíja dē jā sáhá yā jēhē dē.

⁸ De Jesucristo chi iin-ni cáá yā ichi chātā jín mitan jín ní cání.

⁹ Túsaá de mā cuáha ndá nú tūhun jā candíja nú ndācá tūhun jā sín cāhān jāá nduú quétáhán jín

tūhun maá yā. Chi íyó vāha jā cuja ánō ō sáhá tūhun jā vāha inī yā jín ó. De nduú jíní ñúhún ó tūhun jā tatúnī síquī jā yájī ō, chi nduú níhīn tiñú cuitī jín nchivī jā íyó jín.

¹⁰ De maá ó chi névāha ó maá Cristo jā ní nsōcō yā maá yā jēhē ō. De ndācá sūtū jā sócō cā dē modo jā cáhān ley janahán, nduú nā cuá níhīn dē nū yā jā ní nsōcō yā maá yā.

¹¹ De sūtū cúñáhnú cā, tá nī nsōcō dē nīñī ndācá quiti inī cuarto ī cā jā síquī cuāchi, de yiqui cúñu tī nī nteñuhūn dē ichi chátā ñuū.

¹² De sunī súcuán nī ndoho maá Jesús ichi chátā ñuū, tácuā jín nīñī maá yā de sáhá ndoo yā nchivī.

¹³ Túsaá de mā cōó inuú cā inī ō jín nchivī jāá nduú cándíja, chi modo jā cóhōn jín yā ichi chátā ñuū, de ná ndóho ó jín yā jā sáhá catá ji.

¹⁴ Chi ñayīví yáhá nduú nā ñuū íyó nū coo ó ní cání, chi sa ndúcú ó maá ñuū nū cundeē ō quivī quiji.

¹⁵ Túsaá de jā jín Jesucristo de níní ná cáhān ō jā cúñáhnú ndasí Yāā Dios, chi suu cúu tá cúu iin jā sócō ō nū yā, suu jā nácuétáhvī ó nū yā.

¹⁶ De mā náā inī ndá nú jā sáhá vāha nú nū táhán nú, de cuāha nú jā cúmanī nū ji. Chi modo iin jā sócō nū nū Yāā Dios cúu ndācá yáhá, de cúsi inī yā jín.

¹⁷ De cándíja ndá nú nū ndá tēe jā cúu pastor nū, de cuétáhvī nú nū dē. Chi jító ndá dē ndóhó jā quendōo vāha ánō nū, chi jínī dē jā cánuú nacuāha dē cuenta nū yā. De cundihvī inī nū sáhá vāha nú, tácuā cusii inī dē síquī nū de mā cúcuécá inī dē. Chi tú mā sáhá vāha nú de mā cōó jā vāha jín nú.

18 De cācān táhvī nū jēhē ndá nī. Chi nijīn cúu inī ánō ni jāá nduú nā cuāchi nī. Chi cúnī ndá nī caca yíñúhún nī jín ndācá tiñu.

19 De suni cāhān ndāhvī nī jín ndá nú jā cācān táhvī ndasí nú jēhē maá nī, tácuā cuāha yā tūhun jā ñamā cā cuēē tucu nī nū nū.

Bendición jín saludo jā sándhí

20 De maá Yāā jā jēhe tūhun ndeé tūhun sī inī nū ō, nī nastécū yā Jētohō ō Jesucristo māhñú ndīyi. De Jesús cúu pastor cúñáhnú jā jito nchivī jā cúu tá cúu tīcāchí yā. Chi jín nīñi yā nī nsāhá cutú yā contrato jeé yā jā coo ní cání.

21 De ñúhún inī ni jā Yāā Dios ná sáhá yā jā cuja inī ndá nú, tácuā cuu sáhá nú ndācá tiñu váha nāsa jétahān inī yā. De ñúhún inī ni jā jín fuerza Jesucristo jā ndeé yā inī ō, ná sáhá Yāā Dios jā cuu ó nchivī jā cúsi inī yā jín. De ná cāhān ō jā viī ndasí cúñáhnú yā ní cání. Amén.

22 Hermano, cāhān ndāhvī nī jín ndá nú jā cune cahnú inī nū jā sndíhvī inī ni ndá nú jín jacū-ni tūhun jā ní ntee nī nū carta yáhá.

23 De cáchī tūhun nī jā hermano ō Timoteo, ja nī nquee dē vecāa. De tú ñamā quiji dē yáhá, de cuēē ndúū ni nū nū jā cunī tāhán ó.

24 De cāhān ndá nú jín ndá tēe cúu pastor nū jín ndá hermano jā cándija, jā sáhá ndeé inī dē, cáchī ni. De nchivī Italia suni cāhān ji jā sáhá ndeé inī ndá nú.

25 De ñúhún inī ni jā ná sáhá cā Yāā Dios jā váha ndá nú. Súcuán ná cóo. Amén.

Nuevo Testamento en mixteco de Ocotepec New Testament in Mixtec, Ocotepec (MX:mie:Mixtec, Ocotepec)

copyright © 1977 Wycliffe Bible Translators, Inc.

Language: Mixtec, Ocotepec

Translation by: Wycliffe Bible Translators, Inc.

Mixteco, Ocotepec [mie], Mexico

Copyright Information

© 1977, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Ocotepec

© 1977, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

61c6fffd-2562-5253-8242-3993f51527e9